

Morning Dogri (NSD)

31-08-2025

खबरां

1. शंघाई सहयोग संगठन-एस.सी.ओ दे अज्ज शुरू होआ'रदे शिखर सम्मेलन च हिस्सा लैने लेई प्रधानमंत्री नरेंद्र मोदी होर चीन दे टियानजिन पुज्जी गे न।
2. प्रधानमंत्री नरेंद्र मोदी होर अज्ज अपने रेडियो कार्यक्रम 'मन की बात'राएं देश विदेश च रौहने आहले लोकें कन्नै अपने विचार सांझे करडन।
3. रक्षा मंत्री राजनाथ सिंह होरें आखेआ ऐ जे भारत दा रक्षा क्षेत्र च आत्मनिर्भरता आहला मूल मंत्र मुल्ले दी सम्प्रभुता लेई महत्वपूर्ण ऐ।
4. हूतिए इस्राइली हमले च अपनी प्रधानमंत्री दी मौत दी तस्दीक कीती ऐ।
5. कजाखस्तान च 16मीं एशियन निशानेबाजी चैंपियनशिप च भारत नै 50 सुन्ने दे तगमे हासल करियै रिकार्ड कम्म कीता ऐ।



PM-SCO

द'ऊं मुल्ले दे अपने दौरे दे दुए गेड तैहत प्रधानमंत्री नरेंद्र मोदी होर चीन दे टियानजिन पुज्जी गे न जित्थे ओहू अज्ज शुरू होआ'रदे शंघाई सहयोग संगठन-एससीओ दे 25में शिखर सम्मेलन च हिस्सा लैडन। 2 दिनें दे इस शिखर सम्मेलन दरान प्रधानमंत्री मोदी होर क्षेत्रीय सुरक्षा, संपर्क, टिकाउ विकास ते मिम्बर मुल्ले बशकार सहयोग बधाने सने कई महत्वपूर्ण मुद्दे ते चर्चाएं च हिस्सा लैडन। अज्ज शुरू होआ'रदे इस सम्मेलन च शंघाई सहयोग संगठन दे 25एं बरें दे कम्में-कारवाइएं ते उपलब्धिएं दा मूल्यांकन ते विश्लेषण कीता जाग ते 10एं बरें दी विकास नीति गी बी अपनाया जाग।



Modi-Zelensky

प्रधानमंत्री नरेंद्र मोदी होंरें यूक्रेन दे राष्ट्रपति वोलोदिमीर जेलेँस्की हुँदे नै फोन पर गल्लबात कीती ऐ। गल्लबात दरान राष्ट्रपति जेलेँसकी होंरें यूक्रेन सरबंधी हालिया घटनाक्रम ते अपने नजरिए गी लेइयै मोदी हुँदे नै तफसीली गल्लबात कीती। मोदी होंरें राष्ट्रपति जेलेँसकी हुँदा धन्नवाद कीता ते रूस कन्नै उन्दे तनाजे दे रमानदारी ते गल्लबात राएं बनकदा हल्ल तुप्पी कडुने दे अपने रमै गी परतियै उजागर कीता ते एहदे लेई भारत दा पक्का धेइया प्रगट कीता।



PM-MKB

प्रधानमंत्री नरेन्द्र मोदी होर अज्ज दिनै 11 बजे अपने माह्वार रेडियो कार्यक्रम “मन की बात” दे राएं देश-बदेश च रौहने आहले लोकें कन्नै अपने बचार सांझे करडन। एहू इस कार्यक्रम दी 125मीं किशत होग जेहदा प्रसारण आकाशवाणी ते दूरदर्शन दे समूलचे नेटवर्क दे कन्नो-कन्नो आकाशवाणी खबरें दी वेबसाइट ते न्यूज़ ऑन ए.आई.आर मोबाइल ऐप ते डीडी न्यूज़, आकाशवाणी न्यूज़, प्रधानमंत्री हुँदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाहग। आकाशवाणी जम्मू आसेआ मन की बात दे तुरत मगरा एहदा डोगरी च अनुवाद प्रसारत कीता जाहग जिसे तुस रातीं 8 बजे इक बारी परतियै बी सुनी सकदे ओ। आकाशवाणी जम्मू दे प्रादेशिक समाचार एकांश आसेआ अज्ज रातीं साढे 10 बजे मन की बात पर इक बशेश परिचर्चा बी प्रसारत कीती जाहग जेहदे च साढे परौहने होडन जम्मू-कश्मीर स्कूली शिक्षा बोर्ड दे डरैक्टर एकैडमिक्स प्रोफेसर सुधीर सिंह ते उं’दे कन्नै गल्लबात करडन साढी न्यूज़ एन्कर श्रुति खजूरिया।



Rajnath-Military

रक्षा मंत्री राजनाथ सिंह होंरें आखेआ ऐ जे रक्षा क्षेत्र च आत्मनिर्भरता सिर्फ इक विकल्प नेई सगुआं अस्तित्व ते प्रगति दा आधार ऐ। कल नोएडा च आयोजित इक रक्षा सम्मेलन च आखेआ जे आत्मनिर्भर भारत अपनी सामरिक स्वायतता दी रखा करी सकदा ऐ। रक्षा मंत्री होंरें आखेआ जे सरकार सारे महत्वपूर्ण इदारें गी हवाई सुरक्षा अगले 10 बरें च उपलब्ध करोआग। सुदर्शन चक्र मिशन गी मुल्लखै दे भविक्ख दी सुरक्षा आस्तै इक महत्वपूर्ण बदलाव दस्सदे होई रक्षा मंत्री होंरें आखेआ जे इस मिशन दा मकसद रक्षात्मक ते आक्रामक दौनें तकनीकें दा इस्तेमाल करिए मुल्लख भरै च महत्वपूर्ण थाहरें गी पूरी ब्हाई सुरक्षा प्रदान करना ऐ।



RBI-Governor

भारती रिजर्व बैंक-आर.बी.आई दे गवर्नर संजय मल्होत्रा होरें आखेआ ऐ जे भारत तौले गै दुनिया दी त्री सब्भनें थवां बड्डी अर्थबवस्था बनी जाग। उनें मुल्ख दे विकास च तेजी आस्तै प्रधानमंत्री जन धन योजना गी श्रेय दित्ता। रिजर्व बैंक दे गवर्नर हुंदी एहू टिप्पणी ऐसे समें पर आई ऐ जिल्लै चालू माली बरे दी अप्रैल -जून तिमाही च भारत दे सकल घरेलू उत्पाद-जीडीपी दी वृद्धि दर 7 अशारिया 8 फीसद देई ऐ जेडी पिछली 5 तिमाही च सब्बने थमां मती ऐ। इंदौर दे रंगवासा ग्रांड च सरकारी बैंके दे माली समावेशन अभियान संतृप्ति शिविर गी संबोधित करदे होई आखेआ जे केंद्र सरकार ते विज बैंक नै 11 साल पहले बैंके दे सहयोग कन्नै जन धन योजना शुरू कीती ही जेदे कन्नै पूरे देश च विकास होआ।



Ukrain-Head Killing

यूक्रेन संसद दे साबका अध्यक्ष एंड्री पारुबिय दी कल ल्वीव च गोली मारियै हत्या करी दित्ती गई। प्रोसिक््यूटर जनरल हुंदे दफ्तर मूजब इक बंदूकधारी नै पारुबिय पर कई गोलियां चलाइयां जेदे नै उंदी मौके पर गै मौत होई गई। हमलावर गी गिफ्तार करने लेई अधिकारिएं साइरन अभियान चलाया ऐ। यूक्रेन दे राष्ट्रपति वोलोदिमीर जेलेंस्की होरें इसी इक जालमाना हरकत करार दित्ता ऐ। यूरोपीय संघ कन्नै नेडमें सरबंधें दी वकालत करने आहले जन विरोध प्रदर्शनें च पारुबिय होरें प्रमुख भूमिका निभाई ही।



Houthies-PM Killed

यमन दे हूती गुट नै आखेआ ऐ जे इस हफ्ते दे शुरू च राजधानी सना पर होए दे इस्राइली हमले च हूती समर्थित सरकार दे प्रधानमंत्री अहमद अल रहावी ते कई होर मंत्री मारे गे ना। एहू अफसर पिछले 1 बरे च सरकारी गतिविधिएं दी समीक्षा लेई आयोजित इक कार्जशाला दरान मारे गे हे। हूतिएं एहू धेइया कीता ऐ जे सरकार कम्म करना जारी रक्खोग ते तौले गै इस्राइल दे खलाफ जवाबी कार्रवाई कीती जाग। इस हफ्ते दी शुरूआत च इस्राइल नै सना दे कई इलाके पर हमले कीते हे जिंदे च घटोघट्ट 10 लोक मारे गे हे ते 102 दुए घायल होए हे।



Shooting

कजाखस्तान दे शिमकंद च 16मीं एशियाई निशानेबाजी चैंपियनशिप च भारत नै ऐतिहासिक उपलब्धि हासिल कीती ऐ। प्रतियोगिता च पैहली बारी 50 सुन्ने दे तगमे जित्ति ऐ भारत पदक तालिका च शीर्ष थाहर पर रेआ। भारत ने 26 चांदी दे ते 23 कैऽ दे तगमे सने कुल 99 तगमे हासिल कीते। कजाखस्तान दुए ते चीन त्रीऽ थाहर पर ऐ।



American Open Tennis

अमरीकी ओपन टेनिस दे मर्दे दे डबल मकाबले च भारत दे युकी भांबरी ते न्यूजीलैंड दे माइकल वीनस दी जोड़ी दे दुए दौर च पुज्जी गई ऐ। इस जोड़ी नै अज्ज पैहले दौर च अमरीका दे मार्कोस गिरोन ते लर्नर टिएन दी जोड़ी गी 6-0, 6-3 कन्नै हराया। एहदे थवां पैहले भारत दे अनिरुद्ध चंद्रशेखर ते विजय प्रशांत दी जोड़ी नै अमरीका दे क्रिश्चियन हैरिसन ते इवान किंग दी जोड़ी गी हराया।



IMD

मौसम विभाग नै अज्ज राजस्थान, हिमाचल प्रदेश ते उत्तराखंड च भारी थमां मती भारी बरखा पौने दी पेशगोई कीती ऐ। असम, मेघालय, छत्तीसगढ़, आंध्र प्रदेश ते कर्नाटक च बी अगले 2 थमां 3 दिनें दरान ऐसी गै स्थिति बनी दी रौहग। मौसम विभाग नै पच्छिम बंगाल, बिहार, झारखंड, ओडिशा ते तेलंगाना दे कन्नै-कन्नै अंडमान ते निकोबार द्वीप समूह च बी गरज ते तेज बरखा दी मेद जाहिर कीती गई ऐ।



Weather

हिमाचल प्रदेश च मानसून अजें बी सक्रिय ऐ। मौसम विभाग नै अज्ज बी राज्य दे कई इलाके च तेज बरखा दी चेतावनी जारी कीती ऐ। बरखा ते ल्हास-पस्सियां पौने करी प्रभावित इलाके च आम जन-जीवन बहाल करने दे जत्त जारी न। पंजाब अजें तगर दी सब्बनें थमां विनाशकारी हाइदा सामना करा'रदा ऐ।



Weather-J&K

जम्मू च अज्ज बड्डुलै थमां गै भारी बरखा बरै करदी ऐ। मौसम विभाग नै बी अज्जै थमां लेइयै औंदी 2 सितम्बर तगर जम्मू खित्ते दे बक्ख-बक्ख हिस्सें च दरम्याने दर्जे थमां भारी बरखा बरने दी पेशगोई कीती ऐ। मौसम विभाग दे डरैक्टर डाक्टर मुख्तार होरें दस्सेआ ऐ जे अज्ज जम्मू, कठुआ, रजौरी, रियासी, डोडा, रामबन, किशतवाड, सांबा ते उधमपुर च भारी बरखा बरने दे असार न। मौसम विभाग नै इस दरान बद्दल फटने, चानचक्क हाड औने ते ल्हास-पस्सियां पौने दी चेतावनी जारी करदे होई बसनीकें गी गुजारिश कीती ऐ जे ओहू सोहगे-सतर्क रौहन ते कुसै बी एमरजेन्सी दी सूरतै च 112 नम्बरै पर राबता करन।



Export-GDP

आर्थिक विशेषज्ञें चालू माली बरे दी अप्रैल-जून तिमाही च भारत दे सकल घरेलू उत्पाद-जीडीपी दी वृद्धि दर 7 अशारिया 8 फीसद रौहने दी सराहना कीती ते आखेआ जे अर्थ बवस्था सारी मेदें थवां बेहतर ऐ। अर्थ शास्त्री प्रो. यशवीर त्यागी हुंदा मनना ऐ जे 7 अशारिया 8 फीसद दी वृद्धि पैहले दे पूर्वानुमानें थमां मती ऐ।



Telangana-Cabinet

तेलंगाना राज्य मंत्रिमंडल नै राज्य दे पंचैती राज कनून 2018 च तरमीम करने दा फैसला कीता ऐ। एहदे नै राज्य दे ग्रामीण मकामी निकाएं दे चुनाएं च आरक्षण दी सीमा 50 प्रतिशत कोला मती होई जाग। एह चुनां सितंबर च होने आहले न। मंत्रीमंडल दी बैठक दे बाद राज्य दे पिछड़ा वर्ग कल्याण मंत्री पी. प्रभाकर ते राजस्व मंत्री श्रीनिवास रेड्डी होरें कल शामी हैदराबाद च दस्सेआ जे सरकार पिछड़े वर्गे लेई 42 प्रतिशत आरक्षण लागू करने लेई बचनबद्ध ऐ।

